

长。遣马眉叔、联春卿二人往代。其所议论以俭节为生计之源，戒法人浮华滥费，宜留有馀，积累以致富也。英人毕升登函寄歪尔洛得新报一纸，由毕升登上报，以卫护中国人为义，见（榛荔）〔荔榛〕园音乐会有忤触中国人者，发愤切责之也。女士求斯得斯谛阿非尔戈谛尔函寄所刊议论数纸，由大会陈设中国制造，人或訾议之，因为表章其佳处也。俄国遣探西藏路境名布里发拉斯格，叙述罗尔布洛尔，德人立希多文辨其非是，其言东干饥荒与喀什噶尔扰乱情事，中国与西域回部并授俄人以衅端，此可虑也。而西藏各卡闻各国遣使探路，相与戒严据称谛卑得不易入境。谛卑得者，西洋以名西藏者也，恐以后议论必尚烦。埃及古碑致送英国者闻已建立，视法国所得短五尺有奇，而年分为更久。法国运此碑费八万磅有奇，其时火轮舟车之利皆未行，故利人力为多。英国费一万数千磅而已。埃及古碑存者十二，英、法各得其一；君士坦丁得其一；意大利得其一，盖当罗马强盛时所分移而已；埃及仍存其五。其二柱最古者，树立伊里倭波里斯城凡二千馀年；埃及国主移置阿里克三台，实在耶苏降生以前之三十七年，至是一千九百馀年矣。移其一以送之英国，其一仍在阿里克三台。

廿一日。师克勤来谈，始知罗淑亚已回巴黎。偕马眉叔看房屋：一格里来街五十八号，有花园；一亚来马街七号，花园更大；一罗马王街二十七号，有玻璃养花园；一巴得布郎街十九号，花园左右广约里许。四宅皆可住，其他数所不足观也。接李丹崖信转寄唐景星一信，阅之恍然。又见俄国新报二则：一、土尔吉斯丹大率塔什干新报也新报载，七月十三中国兵三千由阿克苏至噶丹，回酋尼亚斯比尔袭败之，军皆覆没。一、费拿弗斯多克新报俄人所踞黑龙江地名载中国窃盗多人扰至其地，调兵捕击。此二条皆不详其原委，然与中国皆有关系，未知究何如也。